

A entrevista con Mariano da radio comunitaria Cuac FM da Coruña comezou coa definición do Laboratorio como un **espazo de encontro e convivencia** onde os colectivos, institucións e calquera persoa interesada na innovación social poida **coñecerse e compartir experiencias**. Debe ser un lugar, entende Mariano, para a creación de **sinerxias** e no que poder explorar as súas posibilidades.

No referido ao seu funcionamento, entende que sería fundamental realizar unha **sistematización de colectivos e persoas**, tanto temáticos como dos proxectos a traballar. Segundo as palabras de Mariano, “normalmente se traballa por afinidade, pero iso non é necesariamente o máis práctico”, polo que habería que facelo a través dun mapa que recolla a todos os axentes da cidade.

En tanto aos riscos ou problemáticas de activar un espazo deste tipo e aos posibles mecanismos para non caer en determinados erros, o entrevistado mostrou certa preocupación de que derive nun **espazo de poder**, xa que iso automaticamente chamaría a cooptación. Provocaría esta posible dinámica que non se avanzara cara espazos novos de colaboración e de xeración de sinerxias. Por iso, remarcou a importancia do **traballo metodolóxico** para o seu correcto funcionamento.

A continuación, en canto ao **nivel territorial**, sinalou que distintos colectivos de diversos ámbitos “poden xerar cousas interesantes, simplemente polo feito de compartir un mesmo territorio no desenvolvemento de actividades”. Ademais, no referido aos ámbitos temáticos e grupos involucrados comentou a relevancia dos colectivos vencellados á saúde. Entende tamén, que deberán estar organizacións como as Asociacións de Veciños e reitera non esquecerse dos colectivos asistenciais.

Con respecto á relación e aportacións mútuas de Cuac FM e do Co-Lab comenta que un proxecto coma este, que aglutine a colectivos de diversa natureza, sería fantástico para o traballo da radio comunitaria, porque “un medio comunitario constrúese coa comunidade e se está dispersa é moitísimo máis difícil chegar a ela. En definitiva entende que Cuac FM debería poder ser o medio de comunicación do Laboratorio. Anota, nun plano xeral, que non se debe esquecer que o paso indispensable é ser quen de conseguir o **empoderamento** das persoas e dos colectivos.

Para concluír, o entrevistado ofrece unha visión do Co-Lab como un lugar no que poidamos **imaxinar a cidade**, onde todos os colectivos se reúnan e onde a diversidade sexa un pilar fundamental dentro do espazo afirmando que está “convencido de que vai a ser un éxito porque cumpre unha necesidade social e cultural”.